

四庫全書

子部

欽定四庫全書

子部

赤水元珠卷十九

詳校官太醫院醫士臣程泰

編修臣倉聖脈覆勘

總校官編修臣王燕緒

校對官助教臣卞惟吉

謄錄監生臣陸潮愈

欽定四庫全書

赤水元珠卷十九

明 孫一奎 撰

藥誤傷人

凡應用小柴胡湯和解誤用承氣湯致身發黃者死
中暑作熱病誤用燥劑者死
腎虛受寒內逼浮陽之火
泛上面赤煩躁身有微熱渴欲飲水不能下咽大便
閉或自利小水淡黃或嘔逆或氣短或鄭聲或咽痛

狀似陽證醫見面赤煩渴便閉認作陽證誤投寒涼
立死陰證身熱面赤足冷煩躁揭去衣被脈來數大
無力不急用加減五積散冷服誤用涼藥者死傷寒
汗多用利小便藥者死陽明病潮熱汗多小便因少
若利之加喘渴者死濕病若發其汗使人耳聾不知
痛處者死病人煩躁自覺甚熱他人以手按其肌膚
殊無大熱此為無根失守之火用涼藥者死

病人應死證

頭重視身此天柱骨倒元氣已敗死大便濁氣極臭者
死目精正圓者死卵縮入腹脈見離經者死瘥後小便
澁有血名曰內外瘡皆黑靨不出膿者死少陰下利止
頭眩時時自冒者死熱盛躁急不得汗出是陽脈極死
舌上黑胎生芒刺刮不去易生者死夏月可治鼻衄自
汗者死胃寒發呃丁香柿蒂良薑湯調服脈不出加
膽汁合生脈散其脈又不出或暴出者皆死

望色

昔肥今瘦主痰大肉脫去主不治平人消瘦主脾熱眼
眶黑主內有痰鼻色青主腹中痛苦冷者死鼻色微黑
者有水氣鼻色黃主小便難鼻色白者屬氣虛鼻色赤
者屬肺熱鼻色鮮明者有留飲鼻孔乾燥者必衄血鼻
色燥如烟煤者是陽毒熱極鼻孔冷滑色黑者是陰毒
冷極鼻流濁涕者屬風熱鼻流清涕者是肺寒鼻孔癢
脹者屬肺熱有風唇口焦紅者吉唇口焦黑者凶唇口
俱腫赤者是熱極唇口俱青黑者是寒熱唇口舌胎斷

紋者難治唇口燥裂者是脾熱唇青舌捲者死唇吻色青者死環口鰲黑者死口張氣直出者死齒燥無津液者是陽明熱極前板齒燥兼脈虛者是中暑齒如熱者難治耳色黑枯燥者是腎憊目赤唇焦舌黑者屬陽毒目熏黃色暗者屬濕毒目黃兼小便利大便黑小腹滿痛者屬畜血目瞑者將欲衄血目之白睛黃兼冷無熱不渴脈沉細者屬陰黃兩胷黃者病欲愈凡開目見人者屬陽閉目不欲見人者屬陰睛昏不識人目反上視

睛小睜目直視目邪視目睛正圓戴眼反折眼眇陷下
此八者皆死證目睛微定暫時稍轉動者屬痰目中不
了了睛不和不明白者此因邪熱結實在內不了了者
謂見一半目不見一半目是也舌腫者難治舌出者死
面顴頰赤在午後此虛火上升不可作傷寒治面赤脈
數無力此伏陰病其證煩躁引飲虛陽上升面赤脈沉
細此少陰病外熱內寒陰盛格陽宜溫誤用寒涼者死
面赤脈弦數此少陽病宜小柴胡和解緣面赤赤乃陽

氣怫鬱在表汗不徹之故宜發汗面部通赤色此陽明
表證未解不可攻裏宜解肌面唇青是陰寒極面青兼
舌捲囊縮亦是陰寒面青兼小腹絞痛是夾陰傷寒面
目身黃兼小水短澀是濕熱面目身黃兼小腹滿硬痛
小便利是畜血傷寒面白為無神或汗多或脫血所致
面白人不宜大汗黑氣在魚尾相牽入太陽者死黑氣
自人中入口者死黑氣自入耳目鼻舌者死面黑人在
傷寒內涉虛不宜參朮大補

聞聲

聲清聲濁 病邪在表其聲清而響啞病邪入裏其聲

濁而不啞

聲輕聲重 病在陽分其聲前輕後重病在陰分其聲

前重後輕

聲斷聲續 病邪表淺併有餘陽證其聲續病邪入深

併內傷不足其聲斷

言壯言怯 外感陽病有餘出言壯厲則寒熱交作內

傷陰證不足出言懶怯則寒熱間作

嘆
嘆是心變動之聲

欠
腎主欠陰氣積下陽氣未盡陽引而上陰引而下
陰陽相引故數欠也

噫
噫是心變動之聲是胸中氣不交通寒氣客于胃
厥逆從上下復出于胃故為噫

噦
噦是腎變動之聲有病發噦是傷風或傷熱無病
發噦是陽氣和滿於心

吞是脾變動之聲

呃其聲皆從胃中至胸嗌間而為呃有胃中實熱失
下者有胃中痰飲者有服寒涼藥過多者有胃中
虛冷者

咳咳是肺變動之聲俗呼為嗽肺為邪干氣逆不下
也有肺寒咳者有停食咳者有邪在半表半裏咳
者

喘陰氣實陽氣虛陰氣速陽氣遲陰氣盛陽氣絕故

為啼

怒
怒是肝變動之聲

歌
歌是脾變動之聲

哭
哭是肺變動之聲

笑
笑是心變動之聲

太息
憂思則心系急急則氣約氣約則不利故太息
以伸屈之

錯語
意錯言亂自知言錯邪氣尚輕自不知覺此熱

甚正氣衰

呢喃

病邪入輕則睡中發此聲也

聲嘶

肺有風熱

聲啞

聲啞唇口見生瘡是狐惑病有風熱傷心肺而

聲啞者少陰病咽中生瘡者有瘡病口禁者有

熱病三四日不得汗出者死

口禁

口禁難言見手足攣掣是風瘕口噤不言難治

陽明病渴欲飲水口噤舌乾白虎加人參湯咽

乾不可汗

舌哽舌短舌強 病邪入深主難治

口噤咬牙 是風症

喉中有聲 喉中嚙嚙有聲者是痰也

卒然無音 寒氣客於厭會則厭不能發發不能下至

其開闔不便故無音

聲如鼻鼾 聲如鼻鼾者難治

久病耳聾 屬氣虛

咽喉不得息

寸脈微浮或沉伏胃中痞鞭氣上衝此

胸中有寒宜吐之

鼻息如鼾睡

屬風溫

耳聾兼脇痛

宜和解寒熱咽而口苦屬少陽

耳聾兼耳腫耳痛

是少陽風熱

問因

口苦口甜

口苦是膽熱口甜是肝熱

舌乾口燥

是胃家熱極

心下滿

因下早致滿為痞氣手按拍之有聲又與此

停水手按則散此虛氣手按鞭痛此宿食

喜明喜暗

喜明屬陽元氣實喜暗屬陰元氣虛

睡向壁向外

向壁屬陰元氣虛向外屬陽元氣實

病起覺不舒快少情緒否有此證是夾氣傷寒

病起覺倦卧骨腿酸疼脇痛否有此證是勞力傷寒要

知病在肝經問婦人乳頭縮不縮

耳聾耳聾邪氣入深難治或兼虛證有少陽證不可

不知

切生死形狀六經六絕脈

雀啄連來三五啄屋漏半日一點落彈石鞭來尋即散
搭指散亂真解索魚翔似有亦似無鰕遊靜中跳一躍
寄語醫家仔細看六脈一見休下藥 一動一止兩日
死兩動一止四日通三動一止六日亡四動一止八日
事五動一止只十日十動一止一年去春草生時即死
期二十一動二年住清明節後始傾亡三十動一止三

年次立秋節後病則危四十動一止四年在小麥一熟是死期五十一動一止五年試草枯水寒時死矣此為太素脈玄秘

左右手脈俱急緊盛是夾食傷寒

右手脈來空虛左手脈來緊盛是勞力傷寒

左手脈來緊盛右手洪滑或寸脈沉身熱惡寒隱隱頭痛喘咳煩悶胸脇體痛是夾痰傷寒

左手脈來緊瀯右手脈沉數心胸脇下小腹有痛處是

血鬱內傷外感

鬼脈 得病之初便譫語或發狂六部無脈大指之下寸口之上有脈動者是

反關脈 如病人六部無脈便不可言其無要在掌後切看脈來動者是

傷寒不可發汗

口燥舌乾者口苦咽乾者咽喉痛者吐血下血者淋血者小便淋瀝者大便瀉利者內傷勞倦者尺脈微弱者

房勞陰虛者夢遺泄精者風濕者濕溫者中暑者瘡漏者

傷寒發汗不出燻法

用發表藥汗不出將蘇葉燒湯以器盛之至於被內兩膝下燻之又法用薑朮綿裹周身擦之其汗自出此良法也

傷寒汗出不止止法

將病人髮披在水盆中足冷于外用炒麩皮糯米粉龍

骨壯蠟燭為末和勻周身撲之其汗自止此良法也

傷寒可吐

胸中懊惱者喉中有痰聲者胸滿鬱鬱微煩者中風寒痰涎擁塞者乾霍亂心腹刺痛欲死者傷寒三四日邪在胸中者脉大胸滿多痰者下利日數行寸口脉滑者寸口脉沉伏或浮滑有痰者

傷寒不可吐

病人元氣虛羸者房勞陰虛者勞倦內傷者胎產崩漏

者寸脈虛細弱無力者經水適斷適來者少陽胆病者
傷寒吐不出探法

用梔子豉湯大瓜蒂散不得吐隨用三山丸合解毒散
煎服再不吐將鷺羽在喉中探吐

傷寒吐不住止法

用炒糯米一撮生薑自然汁少許水煎服凡嘔吐不止者
亦用此二味入各藥中同煎服嘔吐自止如胃實嘔吐
不可用

傷寒不可下

六脈虛細者嘔吐者腹中時滿時減者不轉尿氣者少
陽膽病者腹如雷鳴者陽明面冷赤色者咽中閉塞者
血氣兩虛者內傷勞倦者陰虛勞倦者經水適斷適來
者胎前崩漏者小便清白者夾陰面赤者心下鞭者脈
雖大無力者

傷寒小便不通燻法

一切小便不利先將麝香半夏填患人臍中上用葱白

田螺各搗爛成餅封於臍上用布帶縛住良久下用皂
夾燒烟燻入陰中其水竇自通婦人亦用皂夾煎湯洗
玉戶立通

傷寒胸膈不寬熨法

一切寒結熱結水結食結痞結血結痰結支結大小結
胸痞氣結者俱用生薑搗爛如泥去汁取杓炒熱絹包
漸漸揉熨心胸脇下其滿痛豁然自愈如薑查冷再入
薑汁再炒再熨揉之以愈為效惟熱結用冷薑查揉之

不可炒熱醫當慎之又有傷寒衄血將解未盡或熱極及吐血不盡醫不知其證遂用涼藥之劑止住其衄血留結於心胸之分故滿痛而成血結胸也用加味犀角地黄湯

妊娠傷寒護胎法

用井底泥青黛伏龍肝各為末調勻塗於孕婦臍中二寸許如乾再塗上以保胎孕也

到傷寒家不染病法

凡入病家須避其邪氣不使染著為上以雄黃末塗鼻孔行動從客位而入男子病穢氣出於口女子病穢氣出于陰門其相對坐立之間必須識其向背

用藥寒溫合宜論

如麻黃得桂枝則能發汗芍藥得桂枝則能止汗黃芪得白朮則止虛汗防風得羌活則治諸風蒼朮得羌活則止身痛柴胡得黃芩則寒附子得乾薑則熱羌活得川芎則止頭疼川芎得天麻則止頭眩乾薑得天花粉

則止消渴石膏得知母則止渴香薷得扁豆則消暑黃
芩得連翹則消毒桑皮得蘇子則止喘杏仁得五味則
止嗽丁香得柿蒂乾薑則止呃乾薑得半夏則止嘔半
夏得薑汁則消痰貝母得瓜蒌則開結痰桔梗得升麻
開提血氣枳實得黃連則消心下痞枳殼得桔梗能使
胸中寬知母黃柏得山梔則降火豆豉得山梔治懊懷
辰砂得酸棗則安神白朮得黃芩則安胎陳皮得白朮
則補脾人參得五味麥門則生腎水蒼朮得香附開鬱

結厚撲得腹皮開膨脹草果得山查消肉積神麴得麥
牙能消食烏梅得乾葛則消酒砂仁得枳殼則寬中木
香得薑汁則散氣烏梅得香附則順氣芍藥得甘草治
腹痛吳茱萸得良薑亦止腹痛乳香得沒藥大止諸痛
芥子得青皮治脇痛黃芪得大附子則補陽知母黃柏
得當歸則補陰當歸得生地則生血薑汁磨京墨則止
血紅花得當歸則活血歸尾得桃仁則破血大黃得芒
硝則潤下皂夾得麝香則通竅訶子得肉果則止瀉木

香得擯榔治後重澤瀉得猪苓則能利水澤瀉得白朮則能收濕此用藥相得之大端也

妊娠傷寒禁忌藥

蛇斑水蛭及蝨蟲

烏頭附子配天雄

野葛水銀并巴豆

牛膝薏苡與蜈蚣

三稜代赭芫花麝

大戟蛇蛻黃雌雄

礞石芒硝牡丹桂

槐花牽牛皂角同

半夏南星與通草

瞿麥乾薑桃仁通

硃砂乾漆蟹甲爪

地膽茅根都不中

蒸臍法

用麝香半夏皂莢末一字填患者臍中後用生薑薄
苛貼于臍上放大艾火于薑片上蒸二七壯灸闕元
氣海二十壯熱氣通于內逼于外陰自退而陽自復
矣

熨臍法

用蔥頭縛一把切去葉留白根切餅二寸許連縛四

五餅先將麝香硫黃二字填于臍中放葱餅于臍上以熨斗盛火于餅上熨之餅爛再換餅再熨熱氣入腹以通陽氣如大小便不利以利則止

中寒

中寒寒邪卒時直中陰經即病如中太陰脾經用藿香正氣散合理中湯寒甚加附子如寒中少陰腎經用五積散加茱萸寒熱足冷加附子四逆湯寒熱手足甲唇皆青舌卷囊縮脈伏絕者用蒸臍法及大劑薑

附溫之不然則死矣

傷寒合病

三陽若與三陰合病即是兩感所以三陰無併合例也
大抵傷寒二陽經合病必用二陽經藥合治三陽經
合病必用三陽經藥合治

陰毒傷寒

咽喉不利致毒氣攻心如傷寒時氣得病一二日便結
成陰毒或服藥後三四日或十餘日變成陰毒身重背

強腹中絞痛咽喉不利毒氣攻心心下脹滿硬如石短
氣不息嘔逆唇青面黑四體如冰身如被杖其脈沉細
而疾或伏絕用陰毒甘草湯先進一服如人行十里再
進一服取汗出乃愈蓋陰毒之氣隨汗而出也五六日
可治七日不可治如湯藥不受面唇指甲皆青黑色或
時鄭聲舌卷囊縮煩躁冷汗不止腰背眼痛此皆陰寒
毒氣入深急用蒸臍法如手足溫煖即止知人事者生
灌入生薑汁照前用藥不可與涼劑候服必死

夾陰傷寒

陰極發躁用四逆湯合生脉散入辰砂細茶白蜜冷服
陰利用四逆湯加人參茯苓肉桂肉果砂仁木通燈心
升麻少許服之虛陽伏陰用加減五積散冷服藥服下
噤冷體既消熱性乃發熱因寒用也

寒疫

寒疫四時皆有之若初起病頭疼發熱增寒拘急或吐
逆惡心中脘痞滿或飲食停留不化或腹中作痛未發

熱者宜藿香正氣散加減治之若已發熱者十味芩蘇散汗之若身體痛骨節疼發熱者羌活冲和湯加蘇葱主之若有汗不得再發汗宜加減冲和湯主之若邪熱不解傳入裏變證者宜從正傷寒條內治之

大頭傷寒

若先發於鼻額紅腫以至兩目盛腫而不開并額上面部皆赤而腫者此屬陽明也或壯熱氣喘口乾舌燥咽喉腫痛不利脈來數大者用普濟消毒飲主之內實熱

盛者用通聖消毒飲若發於耳之上下前後并頭角紅腫此屬少陽也或肌熱日晡熱潮熱往來寒熱口苦咽乾目疼脇下滿宜小柴胡加天花粉羌活荊芥連翹芩連主之若發於頭上并腦後項下及目後赤腫者此屬太陽也宜荊芥敗毒散主之若三陽俱受邪併於頭面耳目鼻者以普濟消毒散外用清涼救苦散敷之治法當先緩後急則邪伏也先緩者宜退熱消毒虛人兼扶元氣胃虛食少者宜助胃氣候其大便內熱甚以大黃

下之拔其毒根此緩之法蓋此毒先腫於鼻額次腫於目又次腫於耳從耳至頭上絡後腦結塊則止不散必膿也普濟消毒飲如無板藍根用大青或青黛虛人脈弱加人參引至毒處加皂角刺胃弱食少加白朮橘紅如大便不通加酒浸大黃服後就卧使藥氣上行內熱用荊芥則毒散加酒炒黃芩熱盛加酒炒黃連口渴加天花粉凡頭面腫盛目不開鼻塞悶口乾舌燥內外有熱或咽喉腫痛不利或內實大便秘結脈洪數煩渴宜

用通聖消毒散不消加牛蒡子玄參或生犀角水薑汁
服凡時毒頭面赤腫咽噤堵塞水藥不受若臟腑素有
積熱發為腫毒疣瘡一切惡瘡紅腫並宜漏蘆湯大便
實加大黃芒硝凡雷頭風頭面疣瘡腫痛增寒壯熱四
肢拘急狀似傷寒用清震湯治咽喉腫病用綠雲散以
細竹管吹入喉中病處

食積

身不痛惡食噉氣作嘔欲吐不出惡心短氣痞滿腹脹

胃口痛按亦痛

中濕類傷寒

太陽病關節疼痛脈沉細者此名濕痺其人小便不利大便反快但當利小便凡濕病頭汗出背強欲得被覆向火胸滿小便不利舌上白胎者此丹田有熱胸中有寒渴欲得水而不飲則口燥煩也若誤下則噦為難治若下之額上汗出微喘小便利者死若下利不止者亦死也

痰證類傷寒

如病人目睛微定暫時轉動目如炭煤昔肥今瘦喘嗽
轉側半難臂痛皆痰證也痰在上部寸口脈浮滑痰在
中部右關脈滑大痰在下部尺脈洪滑或痰飲發寒熱
胸滿氣粗語出無倫此夾痰如見崇用二陳湯加蘇子
枳實芩連瓜蒌貝母桔梗山梔前胡薑汁調辰砂溫服
內傷瘀血證發熱狀類傷寒

或被踢打相撲閃胸一時不覺過至半日或一二三日

而發者有至十數日半月一月而發者胸脇小腹滿痛
手不可近者而發寒熱此有瘀血也或一時傷重就發
寒熱瘀血上冲則昏迷不醒如死之狀良久復甦輕則
當歸導滯湯重則薤仁承氣湯加蘇木紅花牛膝桔梗
薑汁量其元氣下其瘀血自愈

漱水不欲嚥

漱水不欲嚥者此屬陽明胃熱也欲飲不欲嚥是邪熱
循經裏無熱也陽明氣血俱多熱逐血妄行作衄但欲

嗽水不欲嚥口燥者用犀角地黃湯外無寒熱喜忘如
狂小便自利大便黑色口燥舌乾但嗽水不欲嚥者此
有瘀血結於下焦宜桃仁承氣湯下盡黑物則愈少陰
證脈沉細手足冷或時煩燥渴嗽水不欲嚥者宜四逆
湯下利厥逆無脈乾嘔煩渴嗽水不欲嚥下宜白通湯
加豬膽汁入人尿煮之厥陰虵厥煩躁吐虵口燥舌乾
但欲涼水浸舌并口唇時不可離不欲嚥下宜理中湯
加烏梅花椒主之大抵陰證發躁煩渴不能飲水或欲

勉強飲下良久誠復吐出或飲水而嘔噦者皆內寒也
宜四逆湯溫之蓋無根失守之火遊於咽嗑之間假作
燥渴則不能飲水也

晝夜偏劇

凡病晝靜夜劇者熱在血分宜四物湯加黃柏知母苓
連山梔丹皮炙柴胡主之若夜靜晝劇此熱在氣分宜
小柴加山梔連母地骨主之

心下滿

傷寒心下滿者當心下高起滿硬者是也不經下後而滿者則有吐下之分若下後心滿者有結胸痞氣之別若發熱者以小柴胡加枳實薑炒黃連去黃芩治之若按之拍拍有聲而軟者此停水五苓散主之若按之硬痛者有宿食也輕則消導重則用承氣下之寒在胸中心下滿而煩饑不能食宜瓜蒂散吐之陽明病心下滿硬者不可下下之則利不止者死脈浮大有力心下硬有燥渴譫語大便實者此屬臟病宜攻之此言屬臟者

宿屎在臟也故下之若食在胃口未入於胃未可下也
大抵腹中滿心下滿胸中滿俱不可用甘草糖棗甘甜
之物蓋甘能補氣填實故也外用薑擦法甚良

遺尿

遺尿者小便自出而不知也大抵熱盛神昏遺尿者可
治若陰證下寒逆冷遺尿脈沉者多難治宜四逆湯加
益智仁主之厥陰囊縮逆冷脈沉遺尿者宜四物加茱
萸湯陽不回者死傷寒汗下之後熱不解陰虛火動而

遺尿者用人參三白湯加黃柏知母麥冬五味歸地主之

大便秘利

下利微熱渴脈弱自愈下利脈數微熱汗出自愈

驚惕

傷寒八九日胸滿煩驚小便不利譫語一身盡通用柴胡龍骨牡蠣湯主之大抵傷寒汗吐下之後虛極之人或因事驚恐遂生驚惕宜養心血安神之劑

呃逆

橘皮半夏生薑湯加茯苓枳實陳皮桔梗凡其氣自臍
下直衝於胸噎間呃忒者此陰證呃忒也其病不在胃
因下虛內有伏陰或誤服寒藥遂至冷極於下迫火上
衝發為呃忒而欲盡也又病人煩躁自覺甚熱他人以
手按其肌膚則冷此為無根失守之火散亂為熱非實
熱也乃水極似火陰證似陽若不識此誤用涼藥下咽
則死當用羌活附子湯加官桂人參木香陳皮半夏砂

仁急溫其下真陽回陰火降呃忒止也陰證及因胃寒
呃忒不止者外用乳香硫黃散嗅法內用丁香柿蒂散
服之則止再灸期門中脘氣海關元此良法也但手足
溫煖脈重者為有生矣灸期門穴法以婦人之乳頭向
下盡處骨間動脈是穴男左女右灸三五壯
中動脈是穴男左女右灸三五壯

譏語

諸譏語脈浮大者生沉小四逆者死也太陽本病邪結

膀胱其人如狂與五苓散利之加辰砂末虛甚錯語柴
胡三白湯加黃連麥冬五味主之

鄭聲

鄭聲者喉中鄭重而不接續如氣息不促手足頗溫其
脈沉細者急以白虎湯加人參五味麥冬助其元氣或
濃煎獨參湯徐徐呷之其脈微細大小便自利手足冷
用白通湯

瘖瘡不言

瘡瘻不言者若少陰病咽中生瘡不能言語者以鷄子
苦酒湯若狐惑上唇青瘡聲啞者在本條瘡病口噤不
能言治在本條熱病瘡瘻不言三四日不得汗出者死
熱甚大腸肺金不能言者宜清肺降火則愈風熱擁盛
咳嗽聲瘥者以消風熱降痰火則愈又有失於發散風
邪伏於肺中者當以發散為主也

陰證似陽

又云面赤目赤引飲脈來七八至按之則散者此無根

之脈用人參四逆湯治之又夾陰中寒面色青脈沉厥
冷囊縮舌卷下利清穀裏寒外熱者身痛脈沉厥冷脈
微欲絕者並用四逆湯瀉多加肉果訶子粟殼炒陳壁
土熟艾木通燈心二十莖取土氣嘔吐不止加薑汁半
夏陳皮胃氣寒嘔不止加丁香咽喉痛不利加桔梗大
腹痛加肉桂乾薑小腹絞痛加茱萸青皮藿香腹痛甚
不止加木香乳香沒藥砂仁熟艾玄胡口食寒物身受
寒氣加砂仁草果藿葉惡寒戰慄加麻黃桂枝骨體疼

痛甚加桂枝羌活蒼朮胃寒發呃加丁香柿蒂茴香良薑為末薑湯調服或入前湯調服立止口吐涎沫加鹽炒茱萸名茱萸四逆有寒痰加半夏薑陳皮悞服寒涼藥過多胸腹脹滿闔格不通嘔逆不止湯藥不受欲死者加丁沉香蘇子檳榔枳實陳皮薑汁傳送去甘草凡尼姑女冠寡婦室女與其有夫妻妾不同患陰寒證者倍加附子不必疑乃陰多陽少故也

冷結

凡人手足厥冷脈沉細無結胸但小腹脹滿按之痛者此冷結膀胱須灸關元穴也宜服茱萸當歸四逆湯磨木香溫服外用揉熨法

虵厥

舌乾口燥常欲冷水不欲嚥虵上煩躁昏亂欲死兩手脈沉遲足冷至膝甚者連虵并尿俱出大便不行此證雖出多端可救治也加味理中安虵湯主之又有胃中空虛蟲無所安反食其真臟之血病人心胸脇下有痛

陣必撮眉呻吟或時下血如豚肝色或如濕毒膿狀或
鮮血下利急迫或昏沉不省人事者一切吐衄雖身大
熱不可與涼劑服之必死俱用理中安蛔湯加減治之
待蛔定却以小柴胡退熱又有厥陰病消渴氣上沖心
饑不能食食即吐衄既曰胃寒復有消渴之證蓋熱在
上焦而中下焦但寒而無熱若大便實用理中湯加大
黃主之吐衄未止加黃連苦楝樹皮細辛治衄不可用

甘草

鬱胃不仁

四逆湯加人參歸桂枝藹著天麻主之凡頭目眩暈非鬱胃也蓋眩暈為輕鬱胃為重

肉瞤筋惕

太陽病發汗出不解仍發汗頭身瞤動振振欲擗地用真武湯合人參養榮湯倍用歸著若不因汗過多其人筋脈跳動者此人稟素血少邪熱傳于六脈之中火動惕也用加味人參養榮湯汗後虛煩不得眠筋惕肉瞤

內有熱以加味溫膽湯

肉苛

肉苛者雖著衣絮猶尚苛也傷寒發汗過多亡其血者乃變此證蓋榮虛而衛實則血氣不得和通肉失所養故頑痺不仁痛痒不知也用羌活沖和湯加桂枝當歸木香主之治肉苛肌肉不仁路龍吉升麻湯治榮虛衛實肌肉不仁滿身痛痒用肉苛羌活湯

百合

若惡寒嘔者病在上焦二十三日愈若腹滿微喘大便
堅三四日一行微溏者病在中焦六十三日愈若小便
淋瀝難者病在下焦三十三日愈並宜百合湯主治百
合病也已經發汗後更發者用百合知母湯已經下後
更發者用百合代赭湯已經吐後更發者用百合鷄子
湯

痰癰

不因汗所生者當平肝木降心火佐以和血之劑用羌

防荊連柴芎歸地川芎天麻參類若兼痰者必加南星
半夏竹瀝薑汁如風邪急搐須兼全蝎姜蠶若曾經汗
下之後多日傳變得此證者為病劇虛極生風用小續
命湯加減凡傷寒汗出露風則汗不流通遂變筋脈攣
急手足搐搦用牛蒡根散主之若用小續命湯有汗去
麻黃無汗去黃芩須要通變治之

循衣摸牀

凡循衣摸牀直視譫語脈弦者生脈濇者死小便利者

可治不利者不可治謂津液枯竭也大抵陰陽二氣俱絕則妄言撮空也若大便秘結撮空譫語燥渴者此為實熱宜承氣湯下之

舌卷囊縮

有陽證有陰證其陽證囊縮者因熱極而縮急用大承氣湯下之陰證囊縮者因寒極而縮急用四逆湯加吳茱萸湯溫之婦人無囊觀其乳頭縮者即是也凡治此症先灸關元氣海丹田及蒸熨法甚效

瘥後發腫

傷寒方愈後浮腫者此水氣也用牡蠣澤瀉散主之胃
虛食少五苓散加蒼朮陳皮木香砂仁胃不虛者以商
陸一味煮粥食之亦妙傷寒大病瘥後足腫者不妨但
節飲食戒酒色胃氣強腫自消

瘥後遺毒

傷寒汗下不徹餘邪結在耳後一寸三分或兩耳下
俱硬腫者名曰遺毒宜速消散緩之必成膿以連翹敗

毒散治之項腫痛加威靈仙大便實加大黃川山甲發
腫有膿不消或已破未破者但用內托消毒散加皂莢
升麻金銀花甘草

瘡後發碗頭瘡

碗頭瘡者亦因汗下後餘毒不盡瘡後故發碗頭瘡也
只以黃連甘草歸尾紅花防風苦參荊芥連翹羌活白
芷煎服外用芒硝赤小豆青黛為末以鷄子清和豬膽
汁調敷瘡上最效勿動待其脫落傷寒瘡後小便澀有

血者名曰內外瘡皆有靨不出膿者死亦是餘熱毒也
用黃連解毒湯加生地歸翹木通滑石牛膝篇蓄琥珀
甘草梢

瘥後勞復

氣虛煩嘔竹葉石膏湯燥渴去半夏知母倍天花粉虛
熱不止者千金麥冬湯

瘥後女勞復

其候頭重不舉目中生花腰背痛小腹裏急絞痛或增

寒發熱或時陰火上衝頭面烘熱心胸煩悶者竹皮燒
視散猥鼠屎有熱加柴胡調赤衣散人虛弱者用參胡
三白湯調赤衣散小腹急痛脈沉足冷用當歸四逆湯
加熟附茱萸送下赤衣散若見卵縮入腹脈見離經者
死

瘥後陰陽易

若傷腎經虛損真陽有寒無熱脈虛足冷者以人參四
逆湯調下燒視散若傷肝經以當歸四逆湯加茱萸熟

附下燒裨散用分寒熱而治陰易熱氣上衝胸中煩悶
手足攣拳搐搦如風狀用瓜蒌竹茹湯婦人病未平復
有犯房事小腸急痛連腰膝痛四肢不仁無熱者當歸
白朮散陰陽易不瘥大便不通心神昏亂驚惕不安用
妙香丸

瘥後虛弱

瘥後虛熱盜汗不止屬陰虛用當歸六黃湯陽虛自汗
無熱惡寒無力下虛用加味黃芪建中湯瘥後心神恍

惚不寧夜卧煩躁不安或亂夢虛驚不眠因汗下過多
心血虧少用硃砂安神丸加遠志酸棗仁茯神有痰加
橘紅

瘥後昏沉

若用知母麻黃取汗者但慮病後血氣兩虛豈可再大
汗之若人元氣壯實脈來有力者乃可行之脈虛人弱
者只用十味溫膽湯有寒熱潮熱日晡發熱者柴胡溫
膽湯加苓連主之

瘥後飲酒復劇

緣傷寒病熱未解而飲酒者則病增劇轉加熱盛脈弦數者用小柴胡合解毒湯加烏梅乾葛砂仁脈洪者用人參白虎湯合黃連解毒湯加乾葛烏梅砂仁主之

妊娘傷寒

若有表證宜汗者用羌活沖和湯加柴胡當歸芍藥蘇葉蔥白即四物沖和湯汗之有氣滿喘急加香附砂仁去生地外用護胎法若裏實熱證大便不通燥渴者當

用大黃轉藥不必疑矣須酒制用有病則病當之設患真寒脈伏厥冷用薑桂附子不必慮也附薑桂雖熱炒制無害必加黃連甘草制之沉香墜之

產後傷寒

產後傷寒不可輕易汗下恐產時傷力其發熱有去血過多有惡露不盡有三日蒸乳發熱或早起勞動或飲食停滯俱有發熱惡寒狀類傷寒不可便用發表攻裏之劑產後惡露不盡亦有發熱惡寒必脇肋脹滿連大

小腹有塊作痛產後飲食停滯發熱頭痛必有噫氣作酸惡聞食臭胸膈飽悶右關脈緊用治中湯加山柰神麴砂仁炒黃連川芎當歸佐之若產後蒸乳發熱惡寒者必乳間脹硬疼痛令產婦揉乳汁通其熱自除不藥而愈矣若果產後不謹虛中入風者當以四物湯加防風荊芥白芷人參香附烏梅姜蠶乾薑產後不謹感冒傷寒發熱惡寒頭疼骨疼脈浮緊表證宜汗者用四物湯加羌活蒼朮白朮乾薑蘇葉梔子少佐用葱白頭水

煎取微汗自汗去蒼朮蘇葉加白朮熱甚加軟柴胡乾薑少許黃芩佐之炒用熱邪傳裏口燥渴大便不通脈沉實或熱甚譫語宜下之輕則蜜導法重則用四物加柴胡炒黃芩枳殼熟大黃徹下就用四物湯加乾薑少許參朮大用以溫補其血氣若熱邪傳至半表半裏證寒熱嘔口苦脈洪數者四物湯合小柴胡主之

不可水

水停心下微微喘

汗吐下而脾胃寒

腹滿結胸兼不食

縱貪切勿與之餐

傷寒大吐下後外氣怫鬱胃中寒也發汗後尤不可
水與之則噦嘔喘咳發熱惡寒濡弱相搏臟氣裏微
胸中苦煩非結也不可水漬青布冷貼胸中誤下後
寒氣相搏腸鳴得水令汗大出即成飢陽明病潮熱
誤下腹滿不能食或胃中虛冷不能食皆不可水下
利脈浮大不可水當溫之傷寒結胸無熱證者宜平
和藥若與水益令熱不得出當汗而不汗則煩假令

汗出後腹中痛亦服和氣之藥

再三汗下熱不退

汗下再三熱弗休

長沙公見應心憂

人參白虎加蒼朮

解毒湯和涼膈傳

經云三下而熱不退者即死後人有四五次下加至十數次行而生者此乃偶誤中耳活者未一二死者已千百觀是之言後之學者切不可以為法但當解毒合涼膈多服調之使陽熱徐退陰脈漸生庶不失

事是知權變者矣傷寒下後自汗虛熱不已白虎湯
加人參蒼朮一服如神汗出身涼此通仙之妙法也
汗下之後熱不退不問有汗無汗皆宜白虎加蒼朮
湯解之又加人參亦妙仍服涼膈合解毒調之發汗
之後熱不解脈尚浮者白虎加蒼朮湯傷寒表解傳
裏熱而不退或有汗而未愈調和陰陽湯病在半表
半裏熱不退小柴胡湯半表半裏大便微實小柴胡
湯加大黃半表半裏大便不通者除膈熱湯裏熱微

者宜除胃熱湯熱勢未退宜六一順氣湯兩除表裏之熱病至六七日裏熱已甚表熱漸微脈雖浮數先用大柴胡湯不退宜解裏熱湯病在半裏半表熱不退脈尚浮洪者當微表小柴胡合白虎湯和之病在半表半裏脈沉實當微利除膈熱湯輕下之汗吐下三法之後別無異證但些微熱或無熱並小柴胡和之口舌乾燥合解毒湯涼之汗吐下之後別無異證大便硬結不通涼膈散病熱已去微熱者以益元散

和之無令再病熱不退發黃斑涼膈散加當歸下後
熱不退或證未全退雙解散雙和表裏大汗前後逆
氣熱勢不退雙解散瘥後遺熱不退雙解散再解之
次用小柴胡和之他人病氣汗毒傳染或食猪羊牛
馬酒毒再復發熱不退雙解散除膈熱湯風寒暑濕
饑飽勞逸憂愁思慮恚怒悲恐四時中外諸邪所傷
意覺身熱頭項拘倦強痛發熱惡寒惡風汗下後熱
不退並宜服雙解散有汗去麻黃無汗加葛根身微

熱不退表虛汗出不已或過發汗以致表虛脉不實
海藏黃耆湯膏膏惡寒發熱不退其人大渴飲水者
其腹必滿小便不利而自汗出其病欲解此為肝乘
肺名曰縱當刺期門發熱不退腹滿譫語寸口脉浮
緊此為肝乘脾名曰橫當刺期門男女下血發熱不
退譫語者此為熱入血室但額上汗出者當刺期門
婦人經水適來適斷者為熱入血室

四肢冷 附四肢沉重四肢不收

下利肢疼屬厥陰

欲眠嘿嘿風溫尋

身如被杖施真武

厥利脈沉四逆珍

四肢疼下利厥逆惡寒脈沉弱四逆湯回陽救急湯
少陰證四肢沉重疼痛嘔咯小便利或自下利而
咳真武湯溫經益元湯四肢沉重唇黑有瘡或如傷
寒四肢沉重忽忽喜眠見多眠條羌活蒼朮湯風溫
証四肢不收嘿嘿欲眠頭疼身熱自汗體重而喘萎
痺湯羌活蒼朮湯

結陽

四肢腫滿結陽名

陽脈住停氣不行

八正五苓兼理胃

消風退腫萬全靈

結陽者肢腫也諸陽脈不行陰府留結成熱為四肢
腫滿也萬全木通散五苓散八正散並加蘿蔔枯酒
曇根妙

結陰

血氣無宗滲入腸

致成便血可驚惶

三黃補血誠為妙

四物阿膠桂附湯

結陰者便血也陰氣內結不得通行血氣無宗滲入腸則下血也四物阿膠湯三黃補血湯桂附六合湯

寒在皮膚熱在骨髓熱在皮膚寒在骨髓

病身大熱反欲衣

寒在骨間熱在皮

寒在皮膚熱骨髓

身寒反不用其衣

身熱惡寒而反欲得近衣者先服麻黃湯汗之次用柴胡桂枝湯和之身寒惡熱而反不欲近衣者先用

防風通聖散人參羌活散表之次用白虎加人參湯和之蘊要云身熱欲衣桂麻各半湯身寒不欲衣白虎加桂枝湯劉全備云身熱而常貪納被內虛寒而邪熱淺浮藥辛溫而取效宜不換金正氣散八解散並加川芎白芷頭疼加細辛羌活葱白藿香正氣散人參養胃湯五積散臨證擇用加減得宜最為良法體寒而欲掀衣素壯熱而感寒鬱閉飲辛涼而必痊宜人參敗毒散防風通聖散升麻葛根湯柴葛解肌

湯參蘇飲等並加黃芩主之

太陽傳經用藥

傷寒傳病太陽始

依次傳經陽明起

若越陰經不順傳

各經引藥加減矣

太陽傳陽明而太陽證已罷陽明證已至曰傳經餘
倣此

太陽傳陽明名巡經傳葛根湯入於裏承氣涼膈下
之

太陽傳少陽名越經傳小柴胡加川芎

太陽傳少陰名表傳裏小承氣涼膈合小柴胡或更
合解毒天水

太陽傳太陰名誤下傳桂枝加芍藥湯桂枝加大黃
湯

太陽傳厥陰名巡經得度傳大承氣湯加川芎柴胡
六一順氣湯

太陽自入於本名傳本未入本為表麻黃湯自入本

為裏五苓散

內傷似外感始為熱中病

始為熱中氣難言

頭痛四肢症悶煎

鼻息不調聞食惡

補中益氣正當先

頭痛大作四肢症悶氣高而喘身熱而煩上氣鼻息
不調四肢困倦不收無氣以動無氣以言或煩躁悶
亂心煩不安或渴不止病久者邪氣在血脈中有濕
故不渴如病渴是心火炎上剋肺金故渴或表虛不

任風寒目不欲開口不知味右手氣口脈大大於左手人迎三倍其氣口脈急大而數時一代而澁是脈之本脈代者是無氣不相接乃脾胃不足之脈是洪大而數乃心脈刑肺急是弦急乃肝脈挾心火剋肺金也其右關脾脈比五脈獨大而數數中顯緩時一代此不甚勞役是飲食不節寒溫失所則右關胃脈損弱隱而不見惟內顯脾脈如此也治用補中益氣湯

內傷似外感末傳寒中病

末傳寒中胃心疼

足弱肢寒噤不通

脈大瀯而腰脊痛

神聖湯施豆蔻同

腹脹胃脘當心痛四肢兩脇膈咽不通或涎唾或清涕或多溺足下痛不能任身履地骨乏無力喜睡兩
瞤丸冷陰作痛或妄見鬼狀夢亡人腰背脾眼腰脊
皆痛不渴不瀉脈盛大以瀯名曰寒中病用神聖復
氣湯白朮附子湯草豆蔻丸

內傷似外感陽明中熱病

內傷中熱類陽明

脾胃久虛因熱乘

清暑益氣加減用

誤施白虎恐難禁

有天氣大熱時勞役得病或路途勞役或田野中勞
役或身體怯弱食少勞役或長齋久素胃氣久虛勞
役其病肌體壯熱躁熱悶亂大惡熱渴飲水漿與陽
明傷寒熱白虎湯證相似鼻口中氣短促上喘此乃
脾胃久虛元氣不足之證身亦疼痛至日西作必譫

語熱渴悶不止脈洪大空虛或微弱白虎湯證其脈
洪大有力與此內傷中熱不同治用清暑益氣湯

內傷似外感溫熱病

溫熱病生長夏間

精神困倦涕垂潛

氣高而喘熱煩悶

清暑湯施益氣還

長夏五六月溫熱之時人困倦四肢不收精神短少
胸滿短氣肢節疼氣高而喘身熱而煩或大便泄利
或黃或白泔色或渴或不渴或不飲食或小便頻數

而黃治用清暑益氣湯

內傷似傷寒

內傷煩躁類傷寒

伏熱蒸蒸總一般

昏倦不眠脉細數

補中益氣倍參安

凡似傷寒煩躁不絕聲汗後復熱脉細數五七日不
睡補中益氣倍人參用竹葉同煎甚者加麥門冬五
味知母

似傷寒三戰後勞乏煩躁昏倦四君子加當歸黃芪

知母麥門冬五味子

似傷寒至五七日汗後煩躁喫水者補中益氣加附子

有舌黑燥大便秘泄食在大腸煩躁夜不安宜防風當歸飲子

內傷病退後燥渴不解者有餘熱在肺參苓甘草少加薑汁冷服虛者用人參湯

房室傷風

房室傷風脈緊浮

頭疼發熱汗如油

解肌羌活湯尤穩

參朮芎歸白朮投

體氣虛弱犯房室而冒傷風頭疼發熱自汗惡風脈
浮緩宜羌活湯大白朮湯並加當歸人參黃芪湯血
虛汗不止加桂枝白芍當歸參朮芎歸湯

凡房室傷風挾內傷者補中益氣湯隨六經加減

頭疼惡寒羌活散身熱石膏湯腹痛合芍藥散寒熱
合柴胡散自汗加白朮茯苓無汗蒼朮防風氣虛合

四君子血虛合四物湯

房室傷寒

房勞因感冒寒憂

無汗頭疼脈緊浮

羌活湯兼大白朮

人參敗毒總宜投

夫人體氣虛弱犯房室而感傷寒頭疼發熱無汗惡寒脈浮緊宜羌活湯大白朮當歸人參川芎湯加當歸蒼朮防風參朮芎歸湯

頭疼發熱自汗惡風脈浮緊無汗惡寒脈浮緩黃耆

湯合川芎湯汗止外證不解九味羌活湯加人參當歸

頭疼身體痛發熱惡寒或惡風或胸痛或咳嗽或寒熱人參敗毒散無汗加蒼朮防風當歸自汗加白朮黃耆當歸人參朮芎歸湯加減

血虛人四物湯頭疼惡風合羌活散腹痛合芎藥散寒熱而嘔合柴胡散上證俱全合服體氣虛甚加人參

頭疼惡風身熱自汗羌活散合石膏湯血虛者更合四物湯

身熱自汗腹痛石膏湯合芍藥散血虛者更合四物寒熱腹痛柴胡散合芍藥散血虛者更合四物湯

頭疼惡風身熱自汗腹中痛寒熱而嘔羌活散石膏湯芍藥散柴胡散四藥合和血虛者更合四物湯

大抵羌活散治頭痛惡風石膏湯治身熱自汗芍藥散治腹中痛柴胡散治寒熱而嘔四物湯治血虛四

君子治氣虛無汗加蒼朮川芎防風自汗加白朮黃
耆茯苓有是諸證臨時選用合服不可執一而無權
也

瘡瘍發熱類傷寒

瘡瘍發熱要詳看

初發防荊敗毒安

已潰還須托裏散

忌投汗劑與涼寒

經曰諸脈浮數當發熱而灑淅惡寒若有痛處飲食
如常畜積有膿也又曰數脈不時則生惡瘡也所以

惡瘡初生必寒熱交作不可便以傷寒治之須視病人頭面脊背有無瘡頭若有小紅白膿頭瘡須當仔細辨之凡發背初作只起一小瘡也不過二三日則大發也若疔瘡初作全與傷寒相似要當識之也若一例而發汗或妄投寒涼之劑則誤之矣若識其瘡毒須尋瘡科治之庶不誤也若毒氣走散則難救矣初生在表瘡毒正發而未潰發熱惡寒宜防荊敗毒散行涼敗毒散隨證加減服之若有涼血止痛草藥

可增入數味在內和服亦可取效速如小薊五爪龍
紫金皮金銀花之類皆可用

如瘡毒已潰宜托裏解毒湯隨證加減或有草藥乾
膿散血之劑亦可增入數味可也如小薊穿山蜈蚣
紫金皮之類是也

初生未成者速塗令消散宜拔毒散已潰爛者用鐵
箍散

赤膈傷寒

赤膈傷寒胸膈上

疼痛赤腫號為名

防風敗毒宜加減

裏實防風通聖靈

夫受傷於寒變故萬狀未易默悟也然胸膈赤腫疼痛頭疼發熱惡寒身體痛此非正傷寒乃類傷寒也名之赤膈傷寒宜防荊敗毒散加瓜蒌子黃連黃芩紫金皮玄參赤芍升麻白芷

有表復有裏胸膈赤腫疼痛防風通聖散加瓜蒌子黃連紫金皮

表證已退大便燥實胸膈腫痛涼膈解毒加瓜蒌子
枳殼桔梗紫金皮赤芍藥又宜稜鐵刺腫處出血
半表半裏胸膈腫痛柴胡枳桔湯加瓜蒌子紫金皮
赤芍藥

黃耳傷寒

黃耳傷寒耳痛詳

要知風入腎經狀

不治卒變成危證

續命防荊敗毒良

凡耳中策策痛者皆是風入於腎經也不治流入腎

則卒然變惡風發熱脊強背直如瘥之狀曰黃耳傷寒也此不可作正傷寒治乃類傷寒法也

治宜小續命去附子加白附子殭蠶天麻羌活獨活蔓荊子細辛

次用防荊敗毒散加細辛蔓荊子白芷蟬蛻黃芩赤芍紫金皮

又法用苦參磨冷水滴入耳中熱則去之再易又虎耳草取汁滴入耳中

又猴薑根取汁滴入耳中

又苦薄苛土木香搗汁滴入耳中

解僂類傷寒

解僂傷寒出內經

四肢骨節苦伶仃

寒如不寒熱不熱

治法通舒血氣寧

解者肌肉解散僂者筋不束骨解僂之證似寒非寒
似熱非熱四體骨節解散懈惰倦怠煩疼飲食不美
食不知味俗呼為砂病內經名為解僂原其因或傷

酒或中濕或感冒風寒或房事過多或婦人經水不調血氣不和皆能為解。依證與砂病相似實非真砂病也。治宜先用熱水蘸搭臂膊而以芎麻刮之甚者更以鍼刺十宣及委中出血或以香油燈照視身背有紅點處皆烙之皆能使腠理開通血氣舒暢而愈又宜服蘇合香丸

砂病類傷寒

嶺南砂病類傷寒

壯熱憎寒肢痛酸

鸛鵒鵒毛糞煨

酒調灰服勝金丹

夫沙病者嶺南閩廣之地多有之矣乃溪毒砂虱水
弩射工蠅短狐鰕鬚之類俱能含砂射人被其毒者
則憎寒壯熱百體分解似傷寒初發之狀彼土人治
法以手捫摸痛處用角筒入肉以口吸出其砂外用
大蒜煨搗膏封貼瘡口即愈諸蟲惟鰕鬚最毒若不
早治十死八九其毒深入於骨若鰕鬚之狀其瘡類
平疔腫彼地有鸛鵒鵒等鳥專食已上諸蟲以此

鳥毛糞燒灰服之及籠此鳥於被毒病者身畔吸之
其砂聞氣自出而病愈也

搖頭

搖頭直視似烟熏

真病心家已絕根

瘥證反張并口噤

頭中痛者戰而言

頭者諸陽之會陽脈有乖則頭為之搖動然有心絕
而搖動者有風盛而搖頭者形證皆不類焉陰根於
陽陽根於陰陰陽互根氣血所以周流而無間若心

絕則神去而陰竭陽獨無根不能自主是以頭搖經
所謂陽獨留形體如烟熏直視搖頭者此也至於太
陽發瘧則風盛於上風主乎動是以頭搖經所謂獨
搖頭卒口噤而背反張者此也言搖頭中有痛也言
則甚痛又云裏動言則為虛不言為實均是搖頭析
而分之曰實邪曰虛邪曰真邪當明其臧否可灸百
會上星風府其搖即定

身痒

陰陽虛弱渾身痒

未解桂枝各半靈

風盛防風通聖散

血虛四物入浮萍

陽明反無汗皮中如蟲行以久虛也朮附湯黃耆建

中湯

風熱盛身痒發熱無汗口燥舌乾大小便秘瀝防風

通聖散加羌活

風證身痒小續命去附子加白附子

血虛身痒四物湯加浮萍蒺藜防風

未交接而作易病治

新瘥瘥後未交接

曾與言談起慾心

思慾切心因病復

女勞易病共條尋

夫男子病新瘥未與婦人交接而男子感動其情思其慾事心切而得病者治與女勞復同

人迎氣口脈

左手關前一分為人迎之位凡脈緊盛廼傷寒也右手關前一分為氣口之位凡脈緊盛廼傷食也若人迎氣

口俱緊盛此為夾食傷寒又曰內傷夾外感也

衝陽脈

衝陽脈在足面去指縫陷谷三寸動脈中此陽明胃經之脈動於此夫胃為水穀之本人之所主若胃氣已憊水穀不進穀神以去其脈不動而死也故傷寒胗衝陽者以察胃氣之有無也仲景又謂之跌陽脈

太谿脈

太谿脈在足內踝後陷中動脈是也此少陰腎經脈動

於此蓋腎者乃人身之命蒂真氣之所主然其脈動而
不息者真氣在也若真氣以憊腎氣以絕其脈不動而
死雖衝陽有脈而少能進食者亦主死也

結脈

結者間至而動緩而一止復來者曰結此陰盛之脈凡
傷寒脈結代心動悸者炙甘草湯若脈結足冷腹中痛
陽氣以微者大建中湯若雜病之脈結者主有老痰食
積死血在內為之可治若內無宿積其脈結者此為不

相應病發多難治也

促脈

促者間至而動數而一止復來曰促此陽盛之脈凡熱極發斑發喘等證皆脈促也雜病則多因怒氣傷肝與夫畜血在於上焦者皆脈促也大抵促脈漸退則生漸加則死矣

代脈

代者止也動而歇至不能自還曰代乃真氣以憊不可

治若結而代者可治非結而獨代者為不可治也

或問近世多用藿香正氣散傷寒可用否然此方宋時所制治內傷脾胃外感寒邪增寒拘急頭痛嘔逆胸中滿悶與夫傷食傷冷傷濕中暑霍亂山嵐瘴氣不伏水土寒熱作瘧並宜增損用之乃良方也非正傷寒之藥若病在太陽經頭疼發熱骨節疼痛者此方全無相干如妄用之先虛正氣逆其經絡雖出汗亦不解此乃無益而反有害往往誤用之遂至變逆危

殆而不救良可悲夫凡傷寒發熱脉沉與元氣虛人并夾陰傷寒發熱者皆不可用切宜戒之

或問局方十神湯傷寒發散可用否然此湯用升麻葛根能解利陽明經瘟疫時氣發散之藥也蓋非正傷寒之藥若太陽經傷寒發熱用之則引邪入陽明經傳變發斑不可勝言也易老云太陽病服葛根是引賊破家也要當辨而用之

或問小柴胡湯近世治傷寒發熱不分陰陽而用之何

也然柴胡之苦平乃足少陽經傷寒發熱之藥解半
表半裏之熱除往來寒熱小有日晡潮熱也佐以黃
芩之苦寒以退熱半夏生薑之辛以散寒人參大棗
之甘溫以助正氣解渴生津液則陰陽和而邪熱解
矣但太陽經之表熱陽明經之標熱皆不能解之也
如誤用不無害乎若夾陰傷寒面赤發熱脈沉足冷
者服之立至危殆可不慎哉及內虛有寒大便不實
脈息小弱及婦人新產發熱皆不可用之也

或問大青龍湯仲景治傷寒發熱惡寒煩躁者服之可用否夫傷寒邪熱在表不得汗出其人則躁亂不安身心無如奈何如脈浮緊或浮數者急用此湯發汗則愈乃仲景之妙法也譬若亢熱已極一雨而涼其理可見也若不曉此理見其躁熱投以寒涼之藥為害豈勝言哉若脈不浮緊數無惡風惡寒身疼者亦不可用之也如誤用其害亦不淺也所以脈證之不明者多不敢用

或問陰證傷寒用附子湯冷服何也蓋陰極於下陽浮在上之治法也余曾治一人傷寒十餘日脈息沉細手溫而足冷大便不通面赤嘔煩渴藥不能下惟喜凉水二三口或西瓜一二塊食下良久而復吐出此陰寒於內逼其浮陽失守之火聚於胸中上沖咽嗝故為面赤嘔煩也遂用附子一箇以生薑自然汁和白麵包裹煨熟去麩取附子去皮臍切作八片又以人參三錢乾薑炮二錢水二鍾煎取一鍾浸於冷水

中待藥冷與之即愈此良法也

或問三陽知可解者何以辯之曰太陽知可解者頭不
痛項不强肢節不痛知表已解也陽明知可解者無
發熱無惡寒無口渴不便難知裏已解也少陽知可
解者寒熱移其時早移於晚氣移於血晚移於早血
移於氣是邪無可容之地知可解也如寒熱日作不
移其時是邪未退也

或問太陽禁忌不可犯者何也曰小便不利利之是犯

本犯本則邪熱入裏不能解此犯之輕也大便不利不可利之是動血動血是犯禁此犯之重也

或問治病必求標本治何標本耶曰假令太陽證傷寒自外入標本有二說以主言之膀胱為本經絡為標以客邪言之先得者為本後得者為標此標先受之即是本也後入于膀胱本却為標也此乃客邪之標本治當從客之標本如麻黃桂枝治其標羌活藁本治其本也

或問陽明證禁忌不可犯者何也曰不當發汗不當利小便犯之竭其津液則生蓄血證唯當益津液為上以其火就燥也蓋津液者連鬚葱白是也

或問半表半裏有幾曰邪在榮衛之間謂之半表半裏太陽陽明之間少陽居身之半表裏五苓散分陰陽膀胱經之半表裏理中湯治吐瀉上下之半表裏

或問傷寒惡寒傷風惡風理之昭然不可易也緣麻黃湯下止言惡風桂枝湯下反言惡寒者何也曰仲景

言傷寒惡寒傷風惡風言之常也桂枝治傷風麻黃
治傷寒一定理也今桂枝湯下反言惡寒麻黃湯下
止言惡風言之變也然惡寒者必惡風惡風者未必
不惡寒也

或問傷風汗自出桂枝湯以散其邪傷寒無汗麻黃湯
以發其汗又言表證未解者用桂枝湯理似相反耶
曰傷風汗出腠理自開傷寒已汗後腠理既開故並
用桂枝湯以解肌可謂宜矣

或問病有身重不能轉側者有身疼不能轉側者何也
曰身重不能轉側者下後血虛津液不榮於外也身
疼不能轉側者風濕相搏於經而裏無邪也經曰傷
寒八九日風濕相搏身體煩疼不能轉側不嘔不渴
脈浮虛而澁者桂枝附子湯主之又曰傷寒八九日
下之後胸滿煩驚小便不利譫語一身盡重不可轉
側者柴胡加龍骨牡蠣湯主之二者頗類皆係不能
轉側但有差殊耳

或問發熱惡寒發於陽無熱惡寒發於陰且如傷寒或發熱或未發熱必惡寒體痛二說皆曰惡寒如何辯之曰傷寒或發熱或未發熱必惡寒體痛嘔逆頭痛項強脈浮緊此在陽可發汗若陰證則無頭疼無項強但惡寒而倦脈沉細此在陰可溫裏也

或問傷風自汗與中暍自汗皆相似傷寒無汗與冬溫無汗皆相類敢問如何不同曰傷風不渴中暍即渴傷寒脈浮緊冬溫脈不浮也

或問經言用藥有言可與某湯或言不可與又有言宜某湯及某湯主之凡此數節旨意不同敢問曰傷寒論中一字不苟觀是書片言隻字之間當求古人之用意處輕重是非得其至理而後始可言醫矣所問有言可與某湯或言不可與者此設法禦病也又言宜某湯者此臨證審決也言某湯主之者乃對病施藥也此三者即方法之條目也

或問時人言下不厭遲汗不厭早斯言若何曰凡汗證

固宜早仲景謂不避晨夜者此也夫下證須從宜定
奪當急則急當緩則緩安可一槩而論假如陽明病
已有可下之理但合面赤其在後之熱尤未斂又如
嘔多雖有陽明證謂熱在上焦未全入府皆言不可
攻凡此之類固宜遲也

或問傷寒論中有證同而藥異有藥同而證異皆非愚
陋之可知也且如小青龍與小柴胡證皆治嘔而發
熱表裏之病大槩彷彿何故二方用藥之不同誠為

可疑也曰治病之要當究病源夫傷寒表不解裏熱未甚而渴欲飲水飲不能多不當與之以腹中熱尚少而不解消水飲停蓄故作諸證然水寒作病非溫熱不能解故用小青龍湯發汗散水其水氣內漬則所搏不一故有或為之病因隨證增損以解化之原其理初無裏證自水寒以然也其小柴胡證係傷寒發熱之邪傳裏在乎半裏間熱氣內盛故生或為諸證緣二證雖曰表裏俱病其中寒熱不同故用藥有

薑桂柴芩之異苟能循理以推之其事之異同自然
明矣更復何疑

或問煩躁不得眠與虛不得眠皆汗下後之餘證夫煩
躁以理言則為熱也虛煩者既言虛字非實熱也何
故煩躁反與薑附湯虛煩仍用梔子豉湯二藥天壤
之隔其理何如曰煩躁本為熱分晝夜則知陽虛虛
煩不得眠無間斷故為裏熱經曰下之後復發汗晝
日煩躁不得眠夜而安靜不嘔不渴無表證脈沉微

身無大熱乾薑附子湯退陰復陽其虛煩不得眠若
劇者必反覆顛倒心中懊懣梔子豉湯以吐胸中之
邪雖曰二證俱煩而不得眠却有寒熱之異故不同
然

或問經言脈浮而緊法當身痛宜用汗解之又曰發汗
後身疼痛脈沉遲新加湯主之夫身疼痛皆係表邪
不盡固宜汗解何故復加人參生薑芍藥以益血也
曰表邪盛則身疼血虛則身亦痛其脈浮緊者邪盛

也其脉沉遲者血虛也盛者宜損之則安虛者宜益之則愈

或問經言服桂枝湯或下之仍頭項強翕翕發熱無汗心下滿微痛小便不利者桂枝去桂加茯苓白朮湯主之夫頭項強痛為邪氣仍在表也雖經汗下而未解猶宜解之何故去桂加茯苓白朮是無意於解表也曰此非桂枝證乃屬飲家也夫頭項強痛既經汗下而不解心下滿而微痛小便不利此為水飲內蓄

邪不在表故云去桂枝加茯苓白朮若得小便利水消腹滿減而熱自除則頭項強痛悉愈矣

或問經言結胸證其脈浮大者不可下下之則死既不可下復作何術以治之曰夫陽沉浮關沉乃結胸不可下之脈浮大心下雖結其表邪尚多未全結也若輒下之重虛其裏外邪復聚而必死矣仲景言此為箴戒使無踵其弊也其脈既不可攻當以俟其變而待其實假如小結胸證其脈浮滑按之則痛故知邪

非深結亦不敢下無過解除心下之熱耳

或問病方入胃何為不傳曰經言陽明居中土萬物所歸無所復傳註曰胃為水穀之海主養四旁四旁有病皆能傳之於胃入胃則更不復傳如太陽傳之入胃則更不傳陽明陽明傳之入胃則更不傳少陽少陽傳之入胃則更不傳三陰已上所言入胃不傳之理乃聖賢之至論也


或問經言病人無表裏證發熱七八日雖脈浮數者可

下之緣攻下之法須外無表邪裏有下證庶幾可攻
今言無表裏證况脉更浮數何故言可下之然此證
此理非僕所知敢問曰此非外感乃內傷也若外不
惡寒裏無譟語七八日消爍津液乃陽盛陰虛之時
苟不攻之其熱不已而變生焉故云脉雖浮數可下
之言不待脉浮而數浮則傷胃數則動脾此非本病
特醫之所為也仲景之意不外是矣凡傷寒當下之
證皆從太陽陽明可下之邪而入於府也故下之今

不言陽明病而止云病人無表裏證此非自表之裏而病也但為可下故編于陽明篇中此章之理非初學所能備悉其意也

或問六經傷寒惟少陰與厥陰有不治之證以二經較之少陰死證尤多未審其理何如曰少陰者腎也位居子正而一陽生於其中是為復卦乃天地之根宰輔之職周旋運用承上使下一動一靜莫非腎之功也病至其經已至危殆陰陽兩全雖危弗咎蓋無陽

而陰獨居故言其死然子中之陽氣微弱凡病則易
為消滅其言死多於厥陰也



赤水元珠卷十九